

von Wulf Wager

Liebesurknall



Wemmr als Ma mit ma blaua Aug ens Geschäft kommt, isch mr allerhand bleede Sprich ausgesetzt. "Hoi, hot de Dei Weib verschlaa?" Ihne ka i's jo vrrota: Jo, i be mit meira Frau zsammagrasselt. Aber dr A'lass war eigentlich en völlig friedfertiger. Lassat se sich dui Gschicht vzehla: Jeden Obend, wemmr em Bett no a paar Seita gleasa hend, machat mir 's Licht aus,

drehat ons zuanander ond gebat ons an scheena fetta Guad-Nacht-Kuss. Normalerweis' hend mir des em Donk-la zemlich guad drauf. Ond onsera Lippalappa den genau aufanadrklappa. Neulich aber hend mr ons om a paar Milisekonda verpasst ond mei Frau knallt mit dr Stirn von ihrem Hommelesgrend mit dr Wucht voma Backstoi genau auf mei Lieblingsaugabraue überm linka Aug. Heimatland, des hot gschwend waih doa, ond selbst en onserm stockfenschtra Schlofzemmer hend ufamol zemlich viel Stern blinkt. I han mr aber nex weiter drbei denkt. Aber am näggschda Morga, wo i en da Spiegel guckt han, han i gseh, dass i nix sieh. Des Aug war komplett zuagschwolla ond hot d'Farb ond Form von ra reifa Zwetschg ghet. Meira Frau han i no gsait, dass Gewalt en dr Ehe koi Lösung wär. Des hot se aber net arg intressiert. Ihr dät dr Meggel au weh hot se gsait. "Des ka scho sei, aber mr sieht's bei Dir halt net!" han i ihr todesmutig erwidert. I soll me net so a'stella, des dät jo wieder vrganga. Klar. Des hot fascht drei Wocha dauert.

Jedesmol, wenn e druf a'gsprocha worda ben, was so zemlich bei jeder Begegnung ond domit gfühlte 5 Milliona Mol war, han e no zom Beschta geba, dass sich mei Frau beim Ausrobiera von dr 587. Stellung vom Kamasutra oifach z' dackelhaft a'gestellt häb!

Bis näggschdmal Ihr

Alle Kolumna zom Nochlesu
ondr www.woascht.de
odr em Facebook em
Wulf Wager Fanclub